

0760-0860- Dungalus Reclusus - Carmina

[0529]

DUNGALI CARMINA.
(Marten. , Ampliss. Collect., tom. VI, pag. 811.)

CARMINA I, II, III, IV. DE CAROLO MAGNO. [0529B]

(Vide Patrologiae tom. XCVIII, col. 1443.)

V. Versus ad ecclesiam.

Haec est mira domus vario depicta metallo, Nobilis in clero, dogmate clara pio. Auro tecta nitent, paries argenteus albet, Ex nitido pressa marmore terra gemit. Haec formosa domus, victor cognoscere debes, Corpora sanctorum continet una trium.

VI. Versus ad fontes.

Hic fons irriguus vitalia dona ministrat, Et renovans populos mittit ad astra Deo. [0529C] En ibi Christus adest, qui primi fontis origo Abluit omne scelus, purgat et omne nefas. Currite nunc, pueri, ad latices undasque sacratas Sordibus immersis munera ferte Deo.

VII. Versus ad fenestram.

Ne David grabatum tentator callidus intret, Signetur Domini ista fenestra manu;Quadrus evangelii defendat numerus omne Corpus et interius cunctipotens animam.

VIII. Versus ad ostium.

Qui Aegyptios agni dudum de sanguine postes Signavit, nostros signet et ipse Deus.

IX. Versus ad ministerium. [0529D]

Qui ex duro latices jussit producere saxo, Hic jubeat purum fundere saepe merum. Sit tibi summa salus semper sine fine beata,Hoc optat Martin vestraeque salutis amator,Assiduis Dominum precibusque poposcerit alium. Aeternamque simul faciat te sumere palmamPectore nam puro Dominum portare mementoUt illum valeas rectorem semper habere, etc.

X. Epitaphium Folradi (abbatis S. Dionysii). [0530D]

Felix illa hominum est mors et pretiosa bonorum, Gloria quam sequitur, vita, salusque, quies. Qui patriam repetunt linquentes exera mundi, Post miseros luctus gaudia longa tenent. Ex quorum numero clarus jam jure sacerdos Corpore deposito hoc jacet in tumulo. Clarus qui meritis vitae, spe, nomine fulsit, Virtutum radiis, splendor ubique suis. Qui probitate pater fuit omnibus atque magister, Illos arte monens, hos pietate

regens. Ecclesiae cultor, fautor peregrum, ultor egentum. Proderat ore cunctis hic pietate pari: Eloquio dulcis, factis probus, ore serenus, [0530C] Pectore nectareo, promptus ad omne bonum. Sed quia certum est te palmam meruisse patrone, Pro peregrino me posco precare tuo.

XI. Epitaphium Fardulfi (abbatis S. Dionysii).

Qui pietate pater, pastor, curaque magister, Tranquillus, placidus, promptus ad omne bonum, Ecclesiae cultor, largus miserator egenum Fardulfus fuerat; hoc jacet in tumulo, In hac aede Dei tolli qui nomine claro Aeternis meruit laudibus et precibus.

XII. Alii versus.

[0530D] Egregii proceres Clotharius ac Dagobertus, Filius et pater hic memorantur laude perenni. Sed magis ecclesiam ditavit hanc Dagobertus Cum Nanthilde sua quem exornant aurea busta.

XIII. Item alii versus.

Effigies regum hic et nomina clara refulgent Praecipui Caroli et Pippini fortis alumni, Optimus Augustus summo quo patre coruscat Caesar, quem peperit Berta pulcherrima mater.

XIV. Epitaphium Pippini regis Italiae. [0531A]

Hoc jacet in tumulo Pippinus rex venerandus, Hesperiam rexit, hoc jacet in tumulo. Francia quem genuit pulchra pietate repletum, Nunc tenet Hesperia Francia quem genuit. Nobilis in genere, pulchra de stirpe coruscans, Quem genuit Carolus nobilis in genere. Nubila cuncta fugans mundi properavit ad aethra, Nunc sine fine manet nubila cuncta fugans. Deque sua facie superabat lilia pulchra, Fulsit clara dies deque sua facie, Nobilior meritis quam quis valet ore referre, In specie pulcher, nobilior meritis. [0531B] Unus amor populi, virtus, pax omnibus una, Dilexit cunctos unus amor populi. Rex bonus et placidus, nulli pietate secundus, Jure alios rexit rex bonus et placidus. Cujus ab ore pio populus sua vota metebat, Suavia cuncta bibit cujus ab ore pio. Raptus ab orbe fuit cito pastor largus egentum Raptus ab ore fuit.

XV. Epitaphium Motharii.

Qui manibus librum, lector, comprehenderit istum Hic praecepta Dei discere sacra potes. Scriptorem forsitan operis si noscere curas, Illius nomen nolo latere tibi. [0531C] Edidit hunc librum Motharius ipse sacerdos, Conscripsit digitis hoc opus ex propriis, Atque in honore dedit sanctae sacer ille Mariae, Ut posset requiem prendere perpetuam. Quisquis es, o lector, librum qui legeris istum, Det sibi dic Dominus perpetuam requiem.

XVI. Item aliud.

Hoc recubat tumulo Motharius ille sacerdos, Qui prius in mundo vixit amore pio. Felix ille fuit, mundi terrena reliquit, Eligat et sanas discere litterulas, Plenius ut Domini potuisset dicere jussa, Ante fuit humilis plenus amore Dei.

XVII. Epitaphium Dungali.

Quisquis es hunc cernens titulum, dic pectore puro, Sit requies illi, lector opime, precor. [0532A] Te precor, omnipotens quadrati conditor orbis, Dungalus ut vigeat miles ubique tuus, Atque suum jugiter defendas corpus in aevum, Ne lupus incautum dilacerare queat. Sidereum ut valeat rite comprehendere Olympum, Cum sanctis vitam participare queat. Quaerere divinum non cessat nocte dieque Auxilium, ut poscit vincere cuncta mala. Divitias varias temnit mundi perituri, A mundi curis libera corda vehit, Atque regit propriam justo moderamine carnem, Pro carnis vitio ne pereat anima. Mortiferasque rogat mundi contemnere pompas, Coelestis regni quaerere lucra rogat. In Domini meditans toto conamine lege, [0532B] Et servit Domino mens pia jure suo. Discipulos proprios illustrat lumine sacro, Ceu posita in celso clara lucerna loco. Scripturas promit casto de pectore sacras, Edocet infirmos et validos pariter. Lacte rigans pueros, et dat capientibus escam, Hinc lac ut capiant, inde cibum pariter. Ceu pia mater alit natos cum mente benigna, Escam grandaevus, lac rudibus tribuens. Plura quid enumerem sanctis virtutibus istis? Dicere quas nequeo, scribere nec valeo. Pectore si fluerent verba ceu flumina nostro, Nec sic sufficerem digna referre tibi. Sis sanus, vigeas, opto, per tempora longa, Perpetuam requiem det tibi, posce Deo. [0532C] Solvitur incertis mundus cum casibus iste, Et genus humanum pessima mors perimit, Cum venit extremum, nil prosunt tempora longa, De mortis nullus lege solutus adest.

XVIII. Epitaphium Authelmi monachi.

Authelmi monachi busto sunt membra sub isto, Mors inimica annis quem tulit in teneris. Principio vitae felix terrena reliquit, Despexit mundum, nunc super astra micat. Nobilis in genere, placidus, bonus, omnibus aequus. Nobilior meritis, quam valet ore loqui. [0532D] Atque fuit sapiens, humilis, pietate repletus, Ingenio fortis, fulsit in orbe potens. Quisquis, o lector, titulum qui perlegis istum, Perpetuam requiem det sibi, posce, Deus.